

Media : Utusan Sarawak

Date : 25 April 2024

Kitar semula: Ajinomoto Malaysia, MAREA bekerjasama

NILAI: Ajinomoto (Malaysia) Berhad (AMB) menyasarkan 100 peratus bahan pembungkusan-nya boleh dikitar semula, dengan kerjasama Malaysian Recycling Alliance (MAREA) dalam usaha untuk amalan lestari di negara ini.

Pengarah Urusan AMB, Riichiro Osawa berkata, satu daripada objektif utama kerjasama itu adalah untuk mengambil bahagian dalam pembangunan dasar dan menyediakan kepimpinan yang berwibawa bagi mewujudkan keadaan yang sesuai untuk membangunkan dan melaksanakan dasar Tanggungjawab Pengeluar Lanjutan (EPR) di Malaysia.

"Kami yakin dengan kerjasama ini, ia akan mempercepat kemajuan ke arah mencapai matlamat Tahun Kewangan 2030 (FY2030) iaitu sifar pelupusan sisa plastik, dengan menggabungkan kekuatan dan sumber, kami dapat memacu perubahan bermakna dan menyumbang kepada masa depan lebih mampan buat Malaysia dan seterusnya.

"Di bawah Pelan Hala Tuju FY2030, Ajinomoto Malaysia komited menjadikan bahan pembungkusan kami 100 peratus boleh dikitar semula. Kami mengiktiraf kepentingan proses pemulihan sebagai sebahagian daripada EPR. Program EPR secara sukarela ini selaras dengan hala tuju yang ditetapkan oleh Ajinomoto Co. Inc Jepun (Ajinomoto Co.), sambil berusaha mencapai sifar sisa plastik menjelang 2030," katanya ketika berucap di Kilang Ajinomoto, Bandar Enstek semalam.

Turut hadir pada Majlis Pelan-



PEKERJA melakukan pekerjaan rutin harian di Kilang Ajinomoto (Malaysia) Bhd, kelmarin.

caran Strategik antara Ajinomoto (Malaysia) Berhad dan MAREA di sini ialah Ketua Pegawai Eksekutif MAREA, Roberto Benetello.

Riichiro berkata, dalam inisiatif sifar sisa plastik, AMB telah mulakan peralihan kepada pembungkusan makanan mampan yang mesra alam dan mudah dikitar semula.

"Walaupun berdepan cabaran dalam mengekalkan kualiti produk dan jangka hayat semasa peralihan ini, pasukan teknikal dan pembekal bahan pembungkusan memberikan sokongan yang sangat berharga. Kami mencapai

kemajuan yang mantap dan menyasarkan untuk menukar kepada pembungkusan makanan mampan yang boleh dikitar semula bagi semua produk menjelang 2026, satu langkah penting ke arah kejayaan pengumpulan dan kitar semula pembungkusan dengan MAREA," katanya.

Beliau berkata, kerjasama ini mengukuhkan komitmen berpanjangan Ajinomoto Group terhadap kelestarian alam sekitar dan menekankan kepentingan tanggungjawab kolektif dalam memacu perubahan positif.

"Kami berbangga dapat ber-

kolaborasi dengan MAREA untuk memajukan inisiatif mampan dan menyumbang kepada manfaat alam sekitar yang berkekalan kepada masyarakat. AMB tetap teguh dalam komitmen terhadap penjagaan alam sekitar dan mewujudkan masa depan lestari," katanya.

Riichiro berkata, MAREA, sebuah organisasi bukan berasaskan keuntungan, memainkan peranan penting dalam meningkatkan usaha ini bagi menyokong peralihan negara ke arah ekonomi kitaran.

— Bernama



ROBERTO Benetello memberi penerangan kepada jurucakap syarikat semasa lawatan kerja ke Kilang Ajinomoto (Malaysia) Bhd.



RAKAN kongsi strategik yang menyertai lawatan ke Kilang Ajinomoto (Malaysia) Bhd.